

Hierosolymam receptam accepimus, undecentesimo supra milleſimum ſalutis anno: captivitatis ejus quadringenteſimo nonageſimo: die, ex quo obſideri a Chriſtianis ducibus cœperat, undequadageſimo. Gothifredus omnium conſenſu Rex Hieroſolymitanus ſalutatus eſt: qui cæteris regni inſignibus acceptis, a coronæ uſu pertinaciſſime abſtinuit, impium eſſe prædicans, Chriſtianum hominem ibi aut eam coronam geſtare, ubi Chriſtus ſummus Rex ſpineam tuliffet, Dum hæc Hieroſolymis aguntur, trepide nunciatur ingentes hoſtium copias appropinquare. Quibus, relicto ad urbem præſidio, Gothifredus non procul ab Aſdona venientibus occurrit. Cruentum hic prælium commiſſum, atque in multas horas, fortuna neutro inclinante, pugna diſtracta eſt: demum ingenti clade accepta, fuſi fugatique ſunt hoſtes, quorum centum millia eo die cæſa auctores ſunt quidam; ex captivis compertum eſt, quingenta armatorum millia ea acie conflixiſſe.

*Gothifredus Rex Hieroſolymitanus declaratur.*

*Vincit Turcos.*

Dum hæc in Syria geruntur, Veneti ex Smyrna Lycii, Pamphili, Ciliciiſque maris oram circumvecti, in Syriam venere, portumque Jopenſem a Chriſtianis prius receptum tenuerunt. Sed haud affirmare auſim, Venetos ex Smyrna proſectos non prius in Syriam veniſſe, quam urbs ſancta expugnata eſſet, quum maritimo commeatu Gallos duces ad Hieroſolymam ſedentes omnino conſtet adjutos: quod ipſum a quibus præſtari potuerit niſi a Venetis, quum omnis ora Syriæ adhuc hoſtium eſſet, non video. Ex Jope Veneti, relicto ad cuſtodiam classiſ valido præſidio, agmine Hieroſolymam contendunt: unde reverſi Aſcalonem urbem maritimam expugnant, quam nuper Galli fruſtra oppugnare fuerant adorti. Gallico ibi præſidio impoſito, Caiphā, quæ & Porphyria dicitur, oppidum Ptolemaidi propinquum obſident: fuitque pugnatione illa ſpe omnium longior. Ne igitur ocioſam omnino illic ſtationem habere viderentur, Tyberiadem interim adorti, deditione ab oppidanis facta, recipiunt: nec ita multo poſt & Caiphā. Sunt qui hæc Gothifredo, non Venetis tribuant. Ego communi conſilio geſta exiſtimo, ut ille terreſtribus copiis, Veneti maritimis rem poſt Hieroſolymam receptam in Syria geſſerint. Atque hinc factum, ut Veneta-

1100

*Aſcalonis & aliarum Syriæ urbium expugnatione.*

rum